

LA USC DI LADINS – VENERDÌ 2 AGOSTO 2013

♦ “Festa ta mont” a Poza!

Passa 100 volontadives e 20 sociazions ve speta te Val de Sèn Nicolò con magnadiva, musega, jeghes, art e spetàcoi

Se taca! Insnet da le 9 da Piaž de Comun pea via la defilada con la Musega da Poza fin sun Piaž de Sèn Nicolò, olache l Comitāt organisador prejentā na cercia de le edizion passade e l program de la festa che en sabeda e domenia te la mont de Poza sporjarà da magnar



e beiver, musega, jeghes e atività per pìcoi e gregn, da le 11 da doman fin dò cena.

Per pascentar l venter sarà polenta, gnoches, lianie, gulasch, formai, fonghes, craut e de auter, e amò fortae, sone e douces de ogni sort. Per se passar l temp se podarà proar la teleferica, i sauc tel fegn, l schi d'erba, l'arch, la raida col pony, l “cunst del Salvan” e i jeghes da n'outa; sarà gropes de musega e spetacoi de teater che va a roda per la festa; tel Vilaje di artisć sarà pitores e zipiadores a l'opera e tel ciastel enjignà per l'ocajion en sabeda vegnarà spilenà “La leggenda di Ciambolfin” e en domenia “L segret del lech de l'ercabuan”. En domenia da le 11 da doman sarà ence la messa e da le 17.30 l debatit “frabicar sa mont”. Ti 2 dis la strada vegn serada, dò l Camping Vidor se pel jir demò a pe o coi pulmins e da la stazion de Bufaure da le 9 da doman pea via la raida con i menacrepes. Sarà i pulmins e l trenin che mena gratis la jent da Pera e da Vich fin sunsom Meida, da le fermade segnade col logo “Festa ta mont”. Program e de altre informazion sul sit www.festatamont.it